



Broj/Број: 03/1-50-1-7-41/09
Sarajevo/Сарајево, 20.7.2009.godine

Z A P I S N I K

41. sjednice Zajedničke komisije za odbranu i sigurnost BiH Parlamentarne skupštine BiH, održane 20. 7. 2009., u vremenu od 9 do 10 sati

Sjednici su prisustvovali sljedeći članovi Zajedničke komisije: Branko Zrno, Šefik Džaferović, Slobodan Šaraba, Vinko Zorić, Ivo Miro Jović, Mirko Okolić, Dušanka Majkić, Hazim Rančić i Adem Huskić.

Sjednici nisu prisustvovali članovi Zajedničke komisije: Jozo Križanović, Drago Kalabić i Sulejman Tihić.

Sjednici su prisustvovali i gosti, predstavnici medija, kao i predstavnici Sekretarijata Parlamentarne skupštine BiH:

- Velibor Lučić i Dragiša Mekić, Ministarstvo vanjske trgovine i ekonomskih odnosa BiH,
- Sead Avdić, Ministarstvo vanjskih poslova BiH,
- Jasmin Ramović, EUPM,
- Jasna Dragičević, Misija OSCE-a u BiH,
- Amel Fako, Ambasada SAD-a u BiH,
- Christian Haupt, USAID PSP u BiH,
- Igor Petković, savjetnik zamjenice predsjedavajućeg Doma naroda PSBiH,
- Zoran Brkić, Sektor za odnose sa javnošću PSBiH,
- Dragica Hinić, sekretar Zajedničke komisije za odbranu i sigurnost BiH, Željko Grubešić, stručni savjetnik, i Jovica Katić, stručni saradnik u Zajedničkoj komisiji za odbranu i sigurnost BiH.

Sjednicom je predsjedavao **Branko Zrno**, predsjedavajući Zajedničke komisije za odbranu i sigurnost BiH. Članove Zajedničke komisije upoznao je s dnevnim redom, te predložio da se prvobitni dnevni red dopuni razmatranjem Prijedloga zakona o kontroli vanjskotrgovinskog prometa robe i usluga od strateške važnosti za sigurnost BiH u drugoj komisijskoj fazi, s obzirom da je prilikom posljednje rasprave o ovom zakonu na Domu naroda PSBiH odlučeno da se Zakon zajedno s amandmanima vrati na ponovno razmatranje Zajedničkoj komisiji. Također, predložio je da se iza te tačke razmatraju i tekuća pitanja, u okviru kojih bi Komisija razmatrala poziv Misije OSCE-a u BiH za bilateralnu posjetu institucijama Republike Slovenije, 24. i 25. 9. 2009., te druga pitanja.

Članovi Zajedničke komisije prihvatili su prijedlog Branka Zrne za dopunu dnevnog reda, te je konstatirano da 41. sjednica Zajedničke komisije za odbranu i sigurnost BiH ima sljedeći

DNEVNI RED

1. Usvajanje Zapisnika 40. sjednice Zajedničke komisije;
2. Razmatranje Informacije o lišavanju slobode u Republici Hrvatskoj Vjekoslava Vukovića, pomoćnika ministra sigurnosti BiH, i aktivnostima preduzetim nakon tog događaja (sačinio: Ministarstvo sigurnosti BiH i Ministarstvo pravde BiH);
3. Prijedlog zakona o kontroli vanjskotrgovinskog prometa robe i usluga od strateške važnosti za sigurnost BiH, druga komisijska faza (predlagač: Vijeće ministara BiH)
4. Tekuća pitanja:
 - a) Poziv Misije OSCE-a u BiH za bilateralnu posjetu institucijama Republike Slovenije, 24. i 25. 9. 2009.;
 - b) Prijedlog Mirka Okolića za upućivanjem dopisa SIPA-i.

Ad. 1. Usvajanje Zapisnika 40. sjednice Zajedničke komisije

Članovi Zajedničke komisije su jednoglasno, sa osam glasova „za“, usvojili Zapisnik 40. sjednice.

Ad. 2. Razmatranje Informacije o lišavanju slobode u Republici Hrvatskoj Vjekoslava Vukovića, pomoćnika ministra sigurnosti BiH, i aktivnostima preduzetim nakon tog događaja (sačinio: Ministarstvo sigurnosti BiH i Ministarstvo pravde BiH)

Branko Zrno je, otvarajući raspravu o ovoj informaciji, naveo da je Predstavnički dom prilikom ranije rasprave navedenu informaciju vratio na prethodno razmatranje Zajedničkoj komisiji za odbranu i sigurnost BiH, ostajući pri tome na svom stajalištu uz očekivanje da Vijeće ministara BiH dostavi kompletnu informaciju o ovom pitanju. Istakao je da su o ovom slučaju dostavljene pojedinačne informacije Ministarstva pravde BiH i Ministarstva sigurnosti BiH. Stoga je predložio da Komisija konstatira činjenicu da Vijeće ministara BiH nije postupilo u skladu sa zaključkom sa 44. i 47. sjednice Predstavničkog doma, odnosno da nije dostavilo cjelovitu informaciju s prijedlogom određenja prema ovom događaju, te predložio zaključak Predstavničkom domu da se ponovo obaveže Vijeće ministara BiH na postupanje u skladu sa usvojenim zaključkom sa 44. sjednice ovog doma.

Nakon rasprave, članovi Zajedničke komisije su jednoglasno, s devet glasova „za“, usvojili prijedlog zaključka Branka Zrne.

Ad. 3. Prijedlog zakona o kontroli vanjskotrgovinskog prometa roba i usluga od strateške važnosti za sigurnost BiH – druga komisijska faza (predlagač: Vijeće ministara BiH)

Branko Zrno naveo je da su svi članovi Komisije materijal za ovu tačku dnevnog reda dobili naknadno, pošto je nakon zakazivanja ove sjednice Dom naroda razmatrao navedeni zakon. Konstatirao je da je Zakon dobio potrebnu većinu u Predstavničkom domu, što nije bio slučaj i u Domu naroda. Kako bi Prijedlog zakona ostao u proceduri, Dom naroda usvojio je zaključak kojim je Zajednička komisija obavezana da pokuša usaglasiti amandmane podnesene na njegov tekst. Potom je otvorio daljnju raspravu o ovom prijedlogu zakona

Dušanka Majkić navela je da je ovaj zakon na Predstavničkom domu dobio potrebnu većinu, jer u momentu glasanja nije bilo 2/3 poslanika iz RS-a koji su bili "protiv", te ocijenila da je neprincipijelno da Prijedlog zakona bude usvojen ako se za njegovo usvajanje nije izjasnila većina poslanika iz RS-a. Konstatirala je da je prilikom prethodnog razmatranja Zakona pred Komisijom dostavila sedam amandmana. Predlagač Zakona ocijenio je da su tri amandmana prihvatljiva, dok ostala četiri nisu.

Od svih predloženih amandmana nijedan njen amandman tom prilikom nije usvojen, te je ovom prilikom predložila članovima Komisije da se ponovo izjasne i ovaj put podrže samo one amandmane koji su prihvatljivi i predlagaču, a to su amandmani I., II. i IV., dok je od amandmana III., V. i VI. i VII., koji nisu prihvatljivi predlagaču Zakona, odustala.

Branko Zrno potom je ponovo pozvao predlagača Zakona da se odredi o svakom od ovih amandmana koje je podnijela Dušanka Majkić.

Dragiša Mekić, predstavnik Ministarstva vanjske trgovine i ekonomskih odnosa BiH, izjasnio se pojedinačno o svakom od ova tri amandmana. Prilikom pojašnjavanja amandmana I. Dušanke Majkić, naveo je da je amandman prihvatljiv predlagaču s obzirom da daje precizniju definiciju robe posebne namjene, nego što je to dao prvobitni Prijedlog zakona.

Kako nije bilo više prijavljenih za diskusiju, članovi Komisije izjasnili su se o ovom amandmanu. Sa osam glasova „za“ i jednim glasom „protiv“ a bez „suzdržanih“ glasova, Komisija je usvojila amandman I. Dušanke Majkić.

Dragiša Mekić je, kratko pojašnjavajući Listu robe posebne namjene, naveo da je i amandman II. Dušanke Majkić prihvatljiv za predlagača Zakona.

Ivo Miro Jović je u svojoj diskusiji o ovom amandmanu predlagača Zakona pitao koliko se njegova priroda uklapa u postojeće ustavno rješenje BiH, s obzirom da se navodi da će se Lista ove robe donositi uz saglasnost nadležnih entitetskih ministarstava, ne navodeći pri tome nadležna kantonalna ministarstva u FBiH.

Vinko Zorić saglasio se s diskusijom Ive Mire Jovića i predložio da ovaj amandman u tom smislu bude izmijenjen da se iza riječi „nadležnih“ briše riječ „entitetskih“.

Šefik Džaferović podsjetio je da je ovaj zakon usvojen na sjednici Predstavničkog doma, a da ga je Dom naroda vratio Komisiji na ponovno razmatranje o amandmanima, čime će se Komisija dovesti u situaciju da usvajanjem ovih amandmana ili neusvajanjem Prijedloga zakona na ovoj sjednici šalje dva različita izvještaja domovima. Istakao je da je amandman koji je prošli put on predložio i koji je podržala Komisija rezultat molbe predstavnika resornog ministarstva da on bude predložen na sjednici Komisije, pri čemu je bio samo formalni predlagač. Stoga je pozvao Komisiju da poništi i taj amandman, ako on stoji na putu usvajanja Zakona, te cjelokupnu raspravu ocijenio pokazateljem da amandmani ne mogu dovesti do boljeg teksta Zakona od izvornog u kojem je predložen.

Kako nije bilo više prijavljenih za diskusiju, članovi Komisije izjasnili su se o amandmanu II. Dušanke Majkić, koji, s tri glasa „za“, četiri glasa „protiv“ i jednim „suzdržanim“ glasom, nije usvojen.

Za amandman IV. Dušanke Majkić **Dragiša Mekić** također je istakao da je prihvatljiv predlagaču Zakona, s obzirom da njime nije definiran način davanja saglasnosti, već samo podnošenje potrebne dokumentacije.

Hazim Rančić ocijenio je ovaj amandman besmislenim, navodeći da su odredbe navedene u njemu definirane sljedećim članom 15. stav 5. Prijedloga zakona.

Šefik Džaferović također je istakao da neće glasati za prihvatanje ovog amandmana, iz istih razloga koje je naveo prilikom razmatranja prethodnog amandmana.

Dušanka Majkić ocijenila je da postoje dvije mogućnosti: da Komisija glasa o ovom amandmanu, da ga ne usvoji ili da se amandman modificira u smislu da se u njegovoj definiciji, pored nadležnih entitetskih organa, navedu i kantonalni organi i organi Brčko Distrikta BiH. Također je pozvala članove Komisije da, ako postoji mogućnost usvajanja ovako korigiranog amandmana, ponovo glasaju i o prethodnom amandmanu I., čime bi isto rješenje primijenili i za njega.

Šefik Džaferović je, replicirajući kratko na navode Dušanke Majkić, rekao da postoji i treća mogućnost – da se o ovim amandmanima, ne umanjujući značaj mišljenja Ministarstva vanjske trgovine i ekonomskih odnosa BiH, očituje i Vijeće ministara BiH, s obzirom da je ono i formalno predlagač Zakona.

Mirko Okolić ocijenio je da su stranke koje su u vlasti najodgovornije za donošenje svih zakonskih rješenja u BiH, pa tako i po pitanju ovog zakona, ocjenjujući da one između sebe moraju prevazići sve nejasnoće i usaglasiti predložene amandmane. Ocijenio je neodgovornom činjenicu da se Zakon ne usvoji radi određenih sitnih tehničkih nedostataka i međusobnih stranačkih prepirki.

Kako nije bilo više prijavljenih za raspravu, Komisija se izjasnila i o ovom amandmanu. S pet glasova „za“ i tri glasa „protiv“, bez „suzdržanih“ glasova, s dovoljnom prostom većinom, ali bez glasova „za“ iz bošnjačkog naroda, Komisija nije usvojila amandman IV. Dušanke Majkić.

Odlučivanje o Prijedlogu zakona u drugoj komisijskoj fazi

Potom se Komisija izjasnila o Prijedlogu zakona u cjelosti, s amandmanom I. Dušanke Majkić usvojenim na ovoj sjednici i amandmanom Šefika Džaferovića, usvojenim prilikom njegovog prethodnog razmatranja na Komisiji, koji su postali sastavni dio njegovog teksta.

S pet glasova „za“, dva glasa „protiv“ i dva „suzdržana“ glasa“, s dovoljnom prostom većinom, ali bez glasova „za“ iz srpskog naroda, Zajednička komisija u ponovnoj raspravi u drugoj komisijskoj fazi nije usvojila Prijedlog zakona o kontroli vanjskotrgovinskog prometa robe i usluga od strateške važnosti za sigurnost BiH.

Ad. 4. Tekuća pitanja

- a) **Poziv Misije OSCE-a u BiH za bilateralnu posjetu institucijama Republike Slovenije, 24. i 25. 9. 2009.**

Dragica Hinić, sekretar Zajedničke komisije, informirala je o pozivu Misije OSCE-a u BiH članovima i Sekretarijatu Zajedničke komisije da posjete institucije Republike Slovenije, navodeći da Komisija treba imenovati do šest svojih članova.

Članovi Komisije su, nakon diskusije, odredili: Branka Zrnu, Šefika Džaferovića i Slobodana Šarabu da, u ime predstavnika naroda iz kojih dolaze, u roku od dva dana Sekretarijatu Komisije dostave imena lica koja će učestvovati u bilateralnoj posjeti Republici Sloveniji.

- b) **Prijedlog Mirka Okolića za upućivanjem dopisa SIPA-i.**

Mirko Okolić predložio je da Zajednička komisija uputi zahtjev Državnoj agenciji za istrage i zaštitu – SIPA za dostavu odgovora na pitanje šta je do sada urađeno po dopisu SDS-a upućenog SIPA-i, a koji je potom priložio Sekretarijatu.

S obzirom da članovi Komisije nisu bili prethodno upoznati sa sadržajem navedenog dopisa, odlučeno je da se o ovom pitanju raspravlja na narednoj sjednici Komisije.

Zapisnik sačinila
Dragica Hinić

Predsjedavajući
Zajedničke komisije
Branko Zrno